

目此爲許閣老腐今彼地豪者以大盎滷腐而雜
珍錯其中有一盎費至千錢者是直以腐爲名耳
非許公所好也

黔縣人喜於夏秋間醃腐令變色生毛隨拭去之
俟稍乾投沸油中灼過如製餛飩法漉出以他物芼
烹之云有海中魴魚之味羽流衲子兢以此解茹
淡之饒卽貴倨亦多嗜之者然余曾一染指直臭
腐耳未覩其神奇也

五代時汪華僭有此土與其妻巡行山川堵築險
要以修四塞之固出入張一眞珠涼傘爲美觀一
日天驟風掣傘入雲表良久墮下珠悉迸落草間
因生草綴珠名眞珠傘云

蓬櫳夜話

終